

M549: Mainzer Friedgebot von 1300

- 0,1 In godes namen . amen . Wir der Scholtheize . die Rehtere . die Radherren
vnd die burger gemeinliche fon Meinze . setzin
- 0,2 vnde machin an disem geinwurtigin brieue . Gode von hiemilriche . zu
liebe vnde zu erin . vnde zu gemache . vnd zu
- 0,3 vriden . leigen . cristen . vnde iuden . richin vnd armen . die zu Meinze
wonint . die in dem vriden wollint . sin .
- 0,4 Allez daz hie nach geschribin sted feste vnde stede zu haldene . fon deme
dage als der brief geschribin ward . bit offe
- 0,5 sente Mertinis dag . der nu allirnehist komin sal . Fon allirerst so setzin
wir vnde machin daz dekein burger
- 0,6 fon Menze . sal eischin in die stad zu Meinze dekeine- vzman in der Stede
lastir odir schadin . odir iemans der in Meinze
- 0,7 ist . Swer auch alsus in die stad geeischen wirt . an deme mag nieman den
vriden brechin . Vnd wanne die meister
- 0,8 daz bevreischint so sullent sie in ane sprechin . vnd der burg' der die vzlude
in die stad hat geeischit . wird er beredit .
- 0,9 er sal uze Meinze farin ein iar zu bezerunge . in den ahte dagin als ime die
burg'meist' gebiedind . odir sal sich inslahi-
- 0,10 bit sim eide . Jst iz auch daz er niht swerit odir vz fert in den ahte dagin .
So sal er zwei iar uzer Meinze varin nach
- 0,11 der meist' gebode . Vnd ist iz dan-e daz er uze Meinze niht in vert . So
sulin die burg'meist' den rad mani- in zu helfene
- 0,12 vnd dar nach den burg' ane grifen . vnd in der Stede Sloz legin eine- mand
. bit der helfe die in deme rade sint . Vnd
- 0,13 sal dar nach vz farin also hie vor geschribin sted . Vnd ist daz er dan niht
vz fert so sal man in also lange . in daz
- 0,14 Sloz legin . als der rad wil So setzin wir vnde machin daz nieman in Meinze
. drage offenliche odir heimeliche .
- 0,15 nahtis adir dagis . diekein panzier . halsberg . Stichmezzir . odir wane
Stichmezzinscheiden . odir andir
- 0,16 ergliche wafn odir wapin . vnd git man des ieman scholt . der sal sich
inslahin bit sim eide . odir sal vier wochi-
- 0,17 vzir Meinze varn . Auch machin wir daz dekein man sal machin zu Meinze
. offenliche odir heimeliche dekein
- 0,18 ergliche haufunge . odir samenu-ge . Wem auch die Meistir des schold
gebint . er vnd die andiren p'sone- sollent sich
- 0,19 des inslahin bit irm eide . odir sulen ein halb iar vzer Meinze varn . Jst abir
daz er vnd die personen . niht swerint

- 0,20 vnd dar nach niht vze Meinze varnt als iz die burg'weist' in gebiedint . So
sal er odir die p'sone- . dar nach faren
- 0,21 vzer Meinze ein iar . ob ieman der geletzit ist odir beswerit . odir des frund
beswerit sin odir geletzit . Als in
- 0,22 die zwene . meister odir ein meist' friden gebiedent vnd der den vriden niht
gelobit bit drauwint . der sal vze Meinze
- 0,23 varin ein iar . vnd ist daz der selbe . odir andir die vbir der meist' odir des
meistirs gebod den vriden brechint
- 0,24 bit der dat . der odir die personin sulin der bezzerunge zwa . dun Jst daz
ieman zu Meinze . vz sime hus . vz sime
- 0,25 houe . odir vz der gazzin da in die burg'weist' vindint daz er bit sinen
vrundin leufit wider der meist' gebod vnd
- 0,26 brichit den vriden . der sal vze Meinze varn zwei iar . vnd sine midevolg'
sulint der bezzerunge zwa dun .
- 0,27 Wel da zusamne . swerint odir gelobint . in der Stede lastir odir schadin .
odir iemans der in Meinze ist . git man ime
- 0,28 des scholt . er sal sich des inslahin bit sim eide . odir sal ein iar uze Meinze
varn . Daz nieman of dem radhus odir
- 0,29 andirswa . da die radherrin zusamne kuoment sal machin keine- obirbraht
in deme rade . vnd wer dar wider dut . der
- 0,30 sal da lidin vnde bezzerin . als daz merre teil des radis heizit . Vnd ist ieman
vzwendig des radis der die Radherrin
- 0,31 widerrufet vnd daz sie machint der selbe vnd sine midefolg' . die sulin vz
Meinze varn einen mand . vnd dar nach bezz'in
- 0,32 als daz merteil des radis sprichit . Daz vnsir burg'weist' . vnd andir von
deme rade . die zu dage rident . fon der zit daz
- 0,33 dirre brief gegeben wart bit offe sente Mertinis messe geleide gebin vzludin
in die Stad zu Meinze . Vnd sal ma- daz
- 0,34 kundin den die da geleidigit sint . Ane den die in des richis ahte sint odir
die die Stad geraubit odir gebrant hant .
- 0,35 Daz kein burg' zu Meinze bit wapenin odir bit gewapinte- ludin sal dekein
vzma- zu helfe kumi- odir helfe tuon .
- 0,36 iz in si dan bit der meist' heize vnd vrlaube . Vnd sal auch daz geschihin
ane der Meist' geuerde . Wer daz brichit der sal
- 0,37 vz Meinze varn ein iar . vnd sal dar nach bezzerin als ime daz merre teil des
Radis gebudit . wird er des beret .
- 0,38 Burg' von Meinze . die of dem lande vm ir selbis gud hant gu schaffene .
die mugin wol bit wapeni- vm ir selbes geschefnisse
- 0,39 riden vnde varn . als in vugin mag ane geuerde . vnd an arge lieste . Wer
den anderin zu Meinze . ergliche heimsuchit .
- 0,40 bit stozne odir bit werfene . an sin hus da er inne wonit . odir daz sine da
niemit ane gerehte . ist daz man is
- 0,41 ime schold git . er sal sich inschuldigin bit sim eide . odir sal ein vierteil
iaris vze Meinze varn . Jst abir daz man in der
- 0,42 heimsuche beredin mag . bit zwein biderbin man-in . er sal deme bezz'in .
dem die heimsuche geschihin ist vnd auch dem gerehte .
- 0,43 dar nach daz der freuil ist . Wel burg' zu Meinze eine- sinen burg' vzwendig
Meinze . an sime libe odir an sime

- 0,44 gude leidigit odir beswerit . wirt er des beredit er sal bezz'in gliche als er
daz in der stad hede getan . Wel burg' zu Meinze
- 0,45 den andirn wundit zu Meinze . mag man . in des beredin . bit zwein
biederbin man-e- . als man ime des scholt git . der sal uz
- 0,46 Meinze varn ein vierteil iaris . vnd e er wid' in Meinze var . so sal er . gebin
dem den er gewond hat zwei pond heller
- 0,47 ob er sie vordert . vnd der stad fonf pond hell' zu bezzerunge . Vnd sal zu
Meinze niht wider in varin er in habe daz gelt
- 0,48 gegeben odir pand die da bezzir sin . Vnd vert er ubir daz in die stad er sal
der bezzeru-ge . zwa dun . Vnd ist daz er des
- 0,49 geldis niht in hat . so sal er niem' in die stad kuomi- . Wer den and'in
blutrunstec machit reufit odir slehit . wan-e
- 0,50 man ime des scholt git . mag in beredin bit zwein biederbin manni- . vnsen
burgi'n . er sal varin vz Meinze einen
- 0,51 mand vnd sal gebin ein halb puond dem der da geletzt ist . ob er daz fordert
. vnd der stad ein pond heller . vnd sal die
- 0,52 pennige gebin e . er wied' in die stad kume . dud e' des niht so sal er der
bezzerunge zwa dun . Vnd ist daz e' des geldes
- 0,53 niht in hat . so sal er vz Meinze varin ein vierteil iaris . Wel burg' . eine-
burg' zu Meinze bit for gesaztem rade . eine-
- 0,54 burg' fon Meinze dot slehit mag man in beredin bit zwein biederben man-i-
. vnsen burgi'n . der sal uz Meinze varn . vonf
- 0,55 iar . vnd sal niht wid' in die stad kuomi- er in habe . fon erst gegeben drizic
puond heller . fonfzehin pund der stad vnd
- 0,56 fonfzehin puond dem gerehte . vnd von allirerst . des dodin vrondin
gebezzirt . ist abir daz ein burg' den andi'n
- 0,57 fon geschichte . ane ofgelaht dod Slehit . mag man in des beredin bit zwein
biederbi- man-i- vnsin burgi'n . er sal uz Meinze
- 0,58 varin zwei iar . vnd sal gebin drizig pond heller . halbe der stad . vnd halbe
deme gerehte . vnd des dodin frund for
- 0,59 abe legin . e . er widir in die stad kume ist daz kein burg' zu Meinze einen
anderin burg' fon Meinze . an eim
- 0,60 augin odir an zwein blendit . mag man in des beredin bit zwein biederbin
man-i- . der sal uz Meinze varin vonf
- 0,61 iar nach der meist' gebode . vnd sal gebin drizig puond . der Stad fonfzehin
pond . vnd dem gerehte fonfzehin pond
- 0,62 e er wider in die stad kume . vnd sal des geblanti- vrund . vnd in fon erst
abe legin e er widir in die stad kume .
- 0,63 ist daz kein burg' zu Meinze . einen man der sich in Meinze genert vnde
gewert . fehit odir firspehit odir hilfit vahin
- 0,64 der burg' . vnd sine helfer burg' zu Meinze . die suln vz Meinze varn vnde
niem' in Meinze komi- . Wel burg' zu Mei-ze .
- 0,65 odir ein andir man vzer Meinze . dekeine iunfrowe- . odir vrowen . in
Meinze odir vzwendic Meinze . fehit odir raubit der
- 0,66 sal uzer Meinze varn vnd niem' wied' in Meinze kuomi- er und sine
midevolg' . Vnd allis des gudis daz die vrowe od' die
- 0,67 Junfrowe hat odir sie ane irsterbin mag . des sal ma- in niht me gebin wen
ir noddurft . vnd den manne nisniht . Vnd

- 0,68 ist daz die vrowe odir die iu-frowe . gud hat . odir sie an irsterbin mag .
vnd bi dem manne stirbit . daz gut daz sie lazint
- 0,69 daz sal . of ir nehisten erbin vnd niht of den man . odir sin erbin fallin odir
sterbin . Jst abir daz die vrowe odir die
- 0,70 Junfrowe . nach des man-is dode . wiedir zu Meinze vert . vnd ir gud wied'
eischit . der sal man ir gud alliz wied' gebin
- 0,71 Vnd ist daz der selbe man . nach sime dode lezit dekein gut in Meinze odir
in der graschaf zu Meinze . daz sal der
- 0,72 Stad sin . Kein burg' fon Meinze sal sine miedeburg' vzer Meinze ladin for
den kunig . vnd wer daz bricht der
- 0,73 sal vzer Meinze varin ein iar . vnd sal vze Meinze also lange sin als daz
merteil des Radis sprichit . Wel man
- 0,74 odir vrowe burg' zu Meinze . wil klagin odir klagit of eins andrin sins burg's
gut vzwendig Meinze gelegin . vmme
- 0,75 scholt . kumit e' zu den burg'meist'in . vnde klagit in daz . so sult die
burg'meist' hime gebieden der of daz gud klagit .
- 0,76 daz er for in reht odir gulde neme . dut . dan ime of des gut geklagit der
gulde odir reht in den vierzehin nahti-
- 0,77 als ime die burg'meist' gebodin hant . so mag der andir of sin gud klagin .
vzwendig Meinze . odir an geislichi-
- 0,78 gerehte innewendig Meinze . Wel burg' zu Meinze sine burg'schaf of git .
vnd klagit of eins burg's gut .
- 0,79 fon Meinze . daz der niem' sedelhaf in Meinze sal werdin . Wa die Stad
fehede hat . vnd unsen burgi'n vrlaub
- 0,80 wird gegeb- zu pendene . die pand sal man antwurte- den burg'meisti'n .
also lange bit wir uns firrehtin bit den
- 0,81 offe die gepand ist . Wel burg' . zu Meinze . die vorgeante- vbeldedig .
die dotslag . wunde- . blutrünst . reufin
- 0,82 odir Slahin hand getan . Jn des daz sie in bezzeru-ge . vze soldin sin vnd
niht wari- vz geuarn . odir die e . der zit zu
- 0,83 Meinze wied' in varint . vnd niht vz geuari- sint . als her nach geschribin
ist . Wer die er si burg' odir widewe . Wer die
- 0,84 in siner herberge heldet heinliche odir offinbar . ist daz man dem burg' .
odir der widewi- . schold git dar um-e . Sie sulint sich
- 0,85 des inslahin bit irm eide . odir sulnt vze Meinze varn . vnd zwiueldige
bezzeru-ge liden . nach der missetad der selbin freueller
- 0,86 ist abir daz die vrowe odir die widewe niht swern wil . sie sal inne ligen
einen mand . Jst daz iman den andrin ergliche
- 0,87 heimsuchit bit wafine- odir ane wafin . wie er sich werit gein sinem vigende
. in sime hus . in sime houe odir in sinem
- 0,88 vrasmu-de da er inne wonit dar ane hat er niht der stede vriden gebrochin
. Wel man odir vrowe burg' zu Meinze
- 0,89 for eins andiri- burgi's hus in Meinze ged und den . ergliche her uz eischit
. der odir die sulin vze Meinze varn ein
- 0,90 vierteil iaris . Wel burg' . zu Meinze vtzwendig Meinze vigende hat . vnd
mezzir eischit zu dragene der sal sine vehide
- 0,91 den meisterin sagin . so sulint sie sine vehede irvarn . ob sie die niht wizzent
. vnd dar nach so sulin sie vrlaub gebin

- 0,92 dem burg' . vnd sinen kindin . vnd sine- knehtin die sin brod ezzint mezzir
zu dragene . vnd die sine kleidir dragi-t
- 0,93 vnd andir gewepnisse an sime libe die wil sin vehede wert . Wer auch sache
daz der burg' . sine kind vnd sine
- 0,94 knehte . in des ieman zu Menze leidigent odir letzin . der selbe odir sine
knehte die sulint bezzin als da uor geschribin
- 0,95 ist . Wel iude ein andrin iuden zu Meinze wundet odir slehit . odir einen
cristeni- der sal vm daz slahin gebin
- 0,96 fonf pund . vnd vm- die wondin zehin pond . heller vnd sal zu Meinze inne
bliben . Vnd hat er des geldes niht . so sal
- 0,97 er also lange vze Meinze varn . bit er des bered wirt bit zwein biederbin
man-i- . eime iuden vnd eime cristen . bit er daz
- 0,98 gelt giebit . Wer ieman zu Meinze . iz si vrowe odir man . der sich
vmbescheidenliche ane legit . da uon sine vrund mogi-
- 0,99 gesmitzit werden . vnd die vrund den meistin daz kundint vnd vore legint
den mugint die meist' vrlaub gebin daz
- 0,100 sie die kestigin . vnd halden also daz iz in an den lib niht in ge . Wel man
zu Meinze inne woni-de ist der Rutinge
- 0,101 dregit . odir swert . odir beseler der sal uz Meinze varin ein vierteil iaris .
ist daz nahtis odir dagis ieman leufit
- 0,102 bit wafeni- zu den vure . als er die glockin horit . vnd dut daz zu helfe ime
der da burnid . ist daz man in dar um-e ane sprichet
- 0,103 er sal si s inslahin mit sim eide . daz er die wapin habe getragin ane geuerde
. vnd dar um-e ist er niht schuldig keine
- 0,104 pine . Wele . vrowe zu Meinze ein andir vrowe Slehit . Stozit . reufit . odir
wundit . wirt sie is beredit bit zwein
- 0,105 man-en odir vrowin . die sal inne ligen einen mand . vnd sal ein halb pund
heller gebin der stad e sie uz ge . vnd hat sie
- 0,106 des geldes niht . so sal sie zwene mande in-e ligin . Wer ieman zu Meinze
. er si vrowe odir man . cristin odir iude
- 0,107 der dem andin drawit vm sin gud . ist daz der dem getrauwit wirt dem
burg'mest' . odir eim andin manne fon deme rade
- 0,108 sagit den dreuwe' . die sulint nach dem dreuw' senden daz er fon ime reht
neme . vnd ist daz er des niht in dut so sal der
- 0,109 dreuw' nach der meist's gebode vz Meinze varn . ein vierteil iaris . vnde dut
er des niht . so sal er der bezzeru-ge zwa dun .
- 0,110 Wer abir sache daz der selbe dreuwe' . als er wied' in die stad kweme . vm
sin vzfart dem selbin andirwerbe dreuwite . so sal
- 0,111 er anderwerbe vz farin ein iar . vnd waz schadin ime deme getrauwit was
dar nach fon des dreuw's wegin geschehe .
- 0,112 des sal die stad warten of des dreuwe's lib unde gut . Jst daz kein lihte man
. ein bose p'sone . vnd ein virlaumu-dit
- 0,113 bosewiht . als iz die meist' irvarint eine- ersami- man bosliche handilt bit
worti- odir bit werkin . ist daz den bosewiht
- 0,114 reufit odir slehit dar um-e ist er niht schuldig dekeine pene . Jst abir daz
der biederbe man . firtregit durch sine biderbekeit
- 0,115 die bose wort odir werk . vnd daz dar nach bringit in den rad bit kuntschaf
. den bosewiht sal man sere slahi-

- 0,116 bit stebin of des bieschoues houe . vnd sal in uze Meinze . driben ein iar .
vnd also lange als die stad wil .
- 0,117 Jst daz ieman . iz si nahtis odir dagis . gewapint zu eime geschreie odir zu
eim gestobe' . dar um-e ist er niht schuldig .
- 0,118 dekeine pene . odir bezzerunge . Jst aber daz man in dar um-e ane sprichit
. er sal sich des inslahin bit sim eide . daz er dare si
- 0,119 komen durch der stede . ere . vnd durch daz beste . Wel burg' zu Meinze
eine- man . sw' er ist . letzit . heizit odir redet leidigi-
- 0,120 odir letzin an sime libe odir an sime gude . Wanne man im des schold git
er sal si s inslahin bit sim eide . daz er daz niht
- 0,121 geradin . odir geheizin odir getan habe . dut er des niht er sal bezzi'n als ob
er daz bit der hand getan hede . als hie vor sted
- 0,122 geschribin . Wel man heizit eine vrowin zu Meinze . slahin . stozin . odir
reufin . der sal bezzi'n den vrevil . als er daz bit d'
- 0,123 hand hede getan . Jst abir daz ein lihte wib vnd ein firlaumu-dit bose vrowe
. einen man bit bosin worte- vnde werkin
- 0,124 ane bringit . slehit . reufit . er odir zuhtigit sie . oder er daz bose wib . dar
um-e . sint sie dekeine bezzeru-ge schuldig . Wel man
- 0,125 zu Meinze eine- man . der zu Meinze sitzit . vnd sich da inne generit vnd
gewerit . leidigit odir letzit der sal bezzi'n nach
- 0,126 siner missetat . als hie vor geschribin sted . Wel burg' geleidigit gerauft
geslagin odir gewond wird . daz sal er klagi-
- 0,127 den meisti'n . daz iz den meisti'n vore kome in dem mande als er geleidigit
odir geletzit ist . dut e' des niht so sal man ime niht
- 0,128 rehtin . Wa zwene burg' zu Meinze . krieg odir vehede bit einand' hant vnd
sich niht wollint sune- lazin . daz die burg'meiste'
- 0,129 maht habin sie zu virrehtene vnd zu sunen-e . Vnd welch' die sune brichit
vnd sie . bede . der odir die sulin vz' Meinze
- 0,130 sin also lange . bit sie die sune die die burg'meist' hant gemacht stede halden
vnd wollinvure . Daz alle unsir burg'
- 0,131 die der vorgeganti- bezeru-ge zwa solden dun . vnd niht in dunt . vnd dar
ubir in der stad blibent vnd niht vz farint . die sulin
- 0,132 die meist' ane grifin vnd in der stede sloz legin also lange . als der Rad wil
. Daz nieman zu Meinze sal halden mu-tlude
- 0,133 die ieman dienen . odir gebin . iz sin cristen odir iuden . Vnd ist iz daz in
die meist' dar um-e ane sprechint er sal sich des
- 0,134 inslahin bit sim eide odir sal uzer Meinze varn ein vierteil iaris . vnd dar
nach dun vnd bezzerin als daz merteil des
- 0,135 Rades sprichit . Jst ieman-is . fadir odir muder . swest' odir brudir . nieftil
odir mag . der uzer Meinze in bezzeru-ge
- 0,136 was gevarn . suerliche bettesiech ligit odir dod ist in Meinze . der selbe
mag wol in Meinze varin ahte dage sinen
- 0,137 vrund zu sehene . vnd sal daz bit der meist' vrlaube geschihin . vnd nach
den ahte dagin sal er wied' uz Meinze varin in
- 0,138 sine bezzerunge . Wel vrowe zu Meinze woninde ist . die da leidigit odir
letzit . odir heizit Jeman-e- leidigin odir letzin
- 0,139 iemanni- zu Meinze . der sich da inne generet vnde gewert . an sime libe .
odir an sime gude iz si vrowe odir man . wan-e

- 0,140 man ir des scholt git sie sal sich intschuldigin bit irm eide . daz sie daz niht
geheizin . geraden . odir getan habe . vnd
0,141 ist daz sie niht in swerit so sal sie inne ligen also lange in irme hus odir vze
Menze varn . ab sie wil . vm ir missetad
0,142 als ein man . der uz solde varn . nach siner missetad . als hie vor geschribin
stet . vnd sal niht geldes gebin .
0,143 Auch nemin vz sunderliche . daz wider vnsem eide vnd unsem gemechnisse
niht in si . daz hie vor geschribin ist
0,144 waz wir bit den iuden fon Meinze dun . schaffin . vnd vbirdragin . Wel
radherre der in der stat zu Menze ist . vnd
0,145 der iz mag gedun for libes nodin . disen Brief in disem mande niht swerit
stede zu haldene . der sal in disem iare niht
0,146 in den rad gen . Wer die iuden vrowin odir man . zu Meinze leidigen . odir
letzit . an irme libe odir an irme gude . der
0,147 sal der vrogenantin bezzerunge zwa dun . Auch ist iz daz ieman in der stede
bezzeru-ge sw'liche vze Meinze wirdit
0,148 bettesich der mag wol in Meinze varn in siner suchede vnd da inne virliben
also lange . bit er gen und sten mag . vnd
0,149 dar nach sal er wider uz farin in sine bezzerunge . Daz wir alse dise vorwort
zu vilzbach sollin halden alse zu
0,150 Meinze . wand vilzbach ligit zu allen deme rehte alse Meinze . Wer uz
Meinze vert in der stede bezzeru-ge der mag
0,151 wol sin wa er wil . wen zu Meinze vnd zu filzbach . Wem die meist' . odir
der Stede knehte for gebiedent . vnd niht
0,152 fore kumit den sal man penden . vor eine- schilling kolschir . Vnd ist daz
er zu dem andrin mal . niht fore kumt . vnd niht
0,153 vz Meinze vert nach der meist' gebode . so sal man in anderw'be penden .
for eine- schilling kolschir . Vnd ist daz er zu me
0,154 dritte- mal niht fore kumit als im die meist' odir ein' selbe gebudit . so
sulin in die burg'meist' ane grifin . Vnd sulint
0,155 in in der stede sloz legin ahte dage . Vnd ist daz er dar nach niht uz fert .
so sulin in die meist' wied' in daz Sloz lege- also
0,156 lange als daz merteil des rades sprichit . Daz nieman zu Menze sal riden .
bit swertin . bit Rutingi- odir bit stichmezzerin .
0,157 odir bit buckel'en odir bit anderm gewefene . er wolle dan-e zu velde ridin
. Vnd wer daz brichit der sal bezzerin
0,158 also gienge er of der erden . iz in si daz man steche . odir tornei habe of
dem houe . Wer die bredig' . augustinre
0,159 barvuzin . wize bruder fon Meinze . heimsuchint . leidigit odir letzit . der
sal bezzerin nach siner missetad als hie
0,160 vor geschribin sted . Wel munich odir non-e . die gehorseme . irm appete
. probiste odir eppetissen hat getan
0,161 vnd uz leufet vnd in die stad zu Meinze ged . Jst daz der appet . prior .
probist odir eppetisse . vnd ir obirste meist'schaf .
0,162 sie wider in ir klostir eischint . die abdornige munche odir non-en . die
sulin wir wied' antwurten ir obirsten meist'schaf
0,163 ob sie daz fordi'nt . Daz alle die zu Meinze inne woni-t . vnd sich da inne
nerint vnd gewe'nt . diz forgenante

- 0,164 gemechnisse stede vnd veste halden . vnd wer daz brichit der sal den vreuil
bezzerin als hie vor geschribin ist . Daz
- 0,165 alle diese vorgeante- vreuel vnd bezzerunge . vnser burg'meist' einer odir
bede sullint forderin dun . vnd vor sich
- 0,166 gebieden bit irm eide . als hie vor bit sunderlingin artikelin geschribin ist .
vnd bescheiden . Vnd ist daz ieman dar
- 0,167 wiedir ist vnd sich gein in setzit . dar zu sulin sie uns manen vnd ane
sprechin . vnd sulin wir in helfen nach unsir
- 0,168 maht bit allem vlize . Daz nieman zu Meinze sal machin odir setzin daz
wider der rad si . odir wid' des radis
- 0,169 gemechnisse . welir leie daz si . vnd w' daz brichit er vnd sine midevolg' .
die sulin nach der meist' gebode . zu bezzeru-ge
- 0,170 vze Meinze varin zwei iar . Jst abir daz iema- id gudis findet daz der stat
vnd deme rade gut ist . odir weiz daz der stad
- 0,171 Schedelich odir erglich ist . der sal iz den meist'i'n . vnd deme rade sagin .
vnde for bringin . Daz wir der rad alle die
- 0,172 einunge die wir in dem rade machin sulen stede halden . vnd welhir unsir
die briechnit . der sal der einu-ge zwa gebin
- 0,173 Daz wir alle dise artikele als die hie vor geschribin stend vnd bit offentlichin
worti- bescheiden sint sulin veste
- 0,174 vnde stede halden ane geuerde und an arge lieste . vnd des helfe uns god .
amen . Auch wart dirre Brief geschribin
- 0,175 vnd gemachit . in des iaris friste . als man zelit fon gods geburte . dusint
iar drau hundirt iar .
- 0,176 Wel man sine burg'schaf of git zu Meinze . vnd of eins andrin burg's gut
klagit fon Meinze . der sal
- 0,177 vz Meinze ein iar farin . vnd sal dar zu also lange . vz Meinze sin vnd
bezzerunge dun . als daz merteil des
- 0,178 rades spriechnit . vnd sal fon allirerst fon der klage lazin . Wel man zu Meinze
inne wonit . vnd der vor geschriben
- 0,179 vreuil eine- odir me tud . odir kuntliche wil dun . vnd sich firbirget als in
die meist' . odir ein' suchit . der
- 0,180 meiste' . vnd sich niht wil lazin vinden . in des freueleris hus odir hof da er
inne wonit . sullint die meiste'
- 0,181 odir ein meist' kuntliche sagi- . vnd gebieden den vriden . Vnd brichit e'
dar nach den vriden so sal er bezzin den
- 0,182 freuil da nach der vreuil ist . glichirwis als heden die meist' . odir ein meist'
ime den vriden gebodin
- 0,183 Jst daz die stad offinlich- vnd gemeine- krieg hat . daz alle unser burg' die
in der stede bezzerunge . vm-e vreuil
- 0,184 vz der stad sin . ane aleine die dotslag hant getan . daz die wider in Meinze
varn . die wile daz alsolich krieg
- 0,185 werit . ob daz merteil des radis des zu rade wirt . vnd wann die burg'meist'
sie heizint wid' uz farin . so sulin sie in
- 0,186 ir bezzerunge wider uz farin . vnd also lange vze sin als sie soldin sin gewesin
. Daz dekein ordin in Meinze .
- 0,187 sal vnsir stede vriheit brechin . odir understen zu brechene . Vnd wel ordin
dar wider tud der sal in der stede vride- niht

- 0,188 sin . Wer vreuel in dekeine munst' . closte' . odir kierchin in Meinze . daz
der zwiueldige bezzeru-ge sal dun
- 0,189 vnde liden . Wer iz daz kein vnsir burg' . eine- vnrehtin krieg odir sache
hat gein ieman-e . gebe er den krieg
- 0,190 odir die sache ein vzman-e . also daz der stat schade odir schade dan abe
kweme des sal man warten of des lib vnd
- 0,191 gut . Daz niema- in dem rade sal nem- dekeiner hande gut odir lehin fon
ieman-e daz wider der stede vriheit odir
- 0,192 ere si . vnd w' daz brichit der sal niem' in den rad kom- . Wel man odir
vrowe erbe hat in Meinze . Sie wonin
- 0,193 in Meinze odir niht for der erbe man gesteinete hat . vnd man noch steine-
sal . vnd sie den zwein den iz die stat beuolin
- 0,194 hat vnd noch beuielit . des geldes niht in gebint . daz die muogi-t pand
forderi- an den . wes daz erbe ist odir
- 0,195 da inne wonit . vnd gebint die des geldes niht . in den ahte dagin . so sult
sie vz Meinze varin einen mand vnd also
- 0,196 lange uze Meinze sin . bit sie daz gelt gegebenint Jst auch sache daz iema- vzir
Meinze wonit . vnd erbe in Meinze
- 0,197 hat . vnd des geldes niht in giebit . so sal der w' in dem erbe wonit . daz
gelt gebin . vnd sal also lange in dem erbe
- 0,198 sitzin vnde wonin bit er daz gelt an dem zinse virsitzit . vnd sal in die stat
des werin . Jst daz iema- in Meinze
- 0,199 mist . erdin . steine . kersal . odir andir vnffledikeit in die gazzin . odir for
sin selbis hus odir hof dut dragin odir
- 0,200 schudet . dar sal iz alle wochi- an dem samztage uz' Meinze schaffin odir
sal ein halb pund helle' gebin Jst auch
- 0,201 daz ieman buwit vnd durch nod holz odir steine . od' andir ding daz dem
buwe horit niht also zitliche mag .
- 0,202 inweg geschaffin . des nod sollin die viere betrahtin . die ubir den buw
gesatz sint . Wel [...] [...] dekeiner
- 0,203 leie [...] [...] vndir einandir [...] [...] iemans [...] [...] andirs hus . hof odir
gartin dut dragin odir stozit
- 0,204 odir vnflat dut von schamt odir schande . mag man in des beredin bit eime
biderbin man odir vrowin den sal ma-
- 0,205 penden vor ein halb pund hellir also dicke als er daz brichit . odir er sal sich
inslahin bit sim eide . Wel iude eischit
- 0,206 kein vnsen burg' . Wie zu helfene zu siner sache zu iudeschim rehte . der
iude sal gebin vonfzig pond heller . zu bezzerunge
- 0,207 der stat . vnd hiner den er dar zu eischit der sal uz Meinze varin eine- mand
zu bezeru-ge Wel burg' .
- 0,208 zu Meinze . gesalzene . odir grune viesche . frisch odir gesalzin durre odir
grune keufit um eine- gast . der sal iz ime
- 0,209 gelden of die zit als er gelobit . odir man sal in da uor pendi- . wa man in
des bit gudir kuntschaf beredin mag .
- 0,210 Waz die meist' . ein' odir bede sprechint . w' sie des widertribit . vnd daz
widerredit er si in dem rade odir vzwe-dig
- 0,211 der sal uze Meinze varn ein vierteil iaris . Wer eine- kaufman slehit . odir
reufit um daz sine . der sal bezzi'n

- 0,212 glicherwis als er daz einem burg' hede getan . Wel man zu Meinze den
andirn ane grifit ane gerehte vnd ane
0,213 klage . der sal varin vz' Meinze ein vierteil iaris . Jz in si daz man ime reht
firsage . Wel burg' eine- kum-ir
0,214 wil dun . der sal in bit der meist' orlaube dun . iz si in Meinze odir vzwendig
Menze . vnd sal den kum-i' den burg'meisti'n
0,215 antwurti- . ob sie den eischend . vnd wer des niht dut der sal uz Meinze
varin ein vierteil iaris vnd sal
0,216 dar nach dun als daz merteil des radis sprichit . Daz niema- der zu Meinze
wonit vnsir burg' . er si vrowe
0,217 odir man . laden sal den and'in um-e keine scheltwort . kumit der kleg' for
die burg'meist' . vnde klagit in . die
0,218 sullin in heizin . daz er da uon laze . vnde dut e' des niht . so sal e' eine-
mand vz Meinze varn . vnd sal doch da uon
0,219 lazin . Wem die meist' den vriden gebiedent zu haldene . brichit e' den bit
den werkin . so sal e' zwei iar uze
0,220 varn . Brichit er in abir bit den wortin . so sal er vze Meinze varn ein halb
iar . der man sal uz farin .
0,221 die vrowe sal inne ligin odir vz farn .